



Broj: 02-05-2856/18-AP-2
Datum: 12.09.2018. godine

Na osnovu člana 5. Zakona o principima lokalne samouprave u Federaciji Bosne i Hercegovine („Službene novine Federacije BiH“, broj: 49/06 i 51/09) i člana 25. Statuta Općine Zavidovići („Službeni glasnik Općine Zavidovići“, broj: 5/2008 i 5/a/2008), Općinsko vijeće Zavidovići na _ . sjednici održanoj dana _ .09.2018. godine, donijelo je

O D L U K U
o proglašenju Grada Zavidovići

I - OPĆE ODREDBE

Član 1.
(Predmet Odluke)

Ovom odlukom se, u skladu sa Zakonom o principima lokalne samouprave u Federaciji Bosne i Hercegovine uspostavlja Grad Zavidovići, određuje njegova teritorija, propisuje svojstvo, organi, način izbora gradskog vijeća i gradonačelnika, uređuje donošenje privremene statutarne odluke, donošenje statuta, raspisivanje izbora i druga pitanja od značaja za primjenu ove Odluke.

Član 2.
(Teritorija)

Teritoriju Grada Zavidovići (dalje u tekstu: Grad) čine sva naseljena mjesta, koja su se prema evidenciji Federalnog zavoda za statistiku nalazila u okviru Općine Zavidovići na dan stupanja na snagu ove Odluke.

Član 3.
(Svojstvo i sjedište)

- (1) Grad je jedinica lokalne samouprave i ima svojstvo pravnog lica.
- (2) Sjedište Grada je u Zavidovićima, na adresi, ulica Mehmed paše Sokolovića, broj 9, 72220 Zavidovići.

II - ORGANI GRADA

Član 4.
(Organi Grada)

Organi grada su Gradsko vijeće i Gradonačelnik, koji svoju funkciju vrše u skladu sa Ustavom Bosne i Hercegovine, Ustavom Federacije Bosne i Hercegovine, Ustavom Zeničko-dobojskog kantona, zakonom i statutom Grada.

Član 5.
(Gradsko vijeće)

(1) Gradsko vijeće je predstavnički organ građana i organ odlučivanja, izabran na način i po postupku utvrđenim Izbornim zakonom, koji funkciju vlasti vrši u skladu sa ustavom, zakonom i statutom Grada.

(2) Broj vijećnika Gradskog vijeća utvrđuje se statutom Grada.

(3) Način izbora i trajanje mandata vijećnika utvrđeni su zakonom.

Član 6.
(Gradonačelnik)

(1) Izvršni organ Grada je gradonačelnik/ca.

(2) Način izbora i trajanje mandata Gradonačelnika utvrđeni su zakonom.

Član 7.
(Međusobni odnosi)

Međusobni odnosi gradskog vijeća i gradonačelnika/ce se zasnivaju na principima međusobnog uvažavanja i saradnje, uz pojedinačnu odgovornost za ostvarivanje vlastitih nadležnosti i zajedničku odgovornost za funkcioniranje Grada.

III - STATUT

Član 8.
(Statut)

(1) Grad ima Statut.

(2) Statutom grada, u skladu sa Ustavom Bosne i Hercegovine, Ustavom Federacije Bosne i Hercegovine, Ustavom Zeničko-dobojskog kantona i federalnim i kantonalnim zakonodavstvom propisuje se i uređuje samoupravni djelokrug Grada, njegova obilježja, sjedište, javna prizanja, organizacije, ovlaštenja i način rada njegovih organa, međusobni odnosi gradskog vijeća i gradonačelnika, oblici neposrednog odlučivanja građana, saradnja sa drugim jedinicama lokalne samouprave i druga pitanja od značaja za Grad.

(3) Statut Grada priprema i usvaja Gradsko vijeće dvotrećinskom većinom vijećnika Gradskog vijeća.

IV - PRAVNO SLJEDNIŠTVO

Član 9.
(Pravno sljedništvo)

(1) Grad Zavidovići je pravni sljednik Općine Zavidovići i ima zakonom određene nadležnosti Grada i preuzima nadležnosti, prava, obaveze i imovinu općine čiji je pravni sljednik.

(2) Grad preuzima grb, zastavu i druga obilježja Općine Zavidovići.

Član 10.
(Mjesna samouprava)

(1) Mjesna samouprava u gradu se ostvaruje u mjesnoj zajednici, kao obaveznom obliku mjesne samouprave koju Gradsko vijeće osniva svojom odlukom, te u gradskim četvrtima i drugim oblicima mjesne samouprave, u skladu sa zakonom i Statutom Grada.

(2) Mjesna zajednica ima svojstvo pravnog lica u okviru prava i dužnosti utvrđenim Statutom i Odlukom o osnivanju.

(3) Poslovi iz djelokruga mjesne zajednice, organa i mjesne zajednice, postupak izbora, organizacija i rad organa mjesne zajednice, način njihovog odlučivanja, te druga pitanja od značaja za rad i funkcionisanje mjesne zajednice, uređuju se Statutom mjesne zajednice koji mora biti u skladu sa Statutom Grada.

V - PRELAZNE I ZAVRŠNE ODREDBE

Član 11. (Usklađivanje akata)

(1) Statut, svi drugi akti i obilježja uskladit će se sa ovom Odlukom i Zakonom u roku od 12 mjeseci od dana stupanja na snagu Zakona o uspostavljanju Grada Zavidovići.

(2) Općinske službe za upravu, upravne organizacije i drugi općinski organi i službe stupanjem na snagu ove Odluke nastavljaju s radom kao gradske službe za upravu, gradske upravne organizacije i drugi gradski organi i službe.

Član 12. (Primjena propisa)

(1) Do donošenja Statuta Grada primjenjivat će se odredbe Statuta Općine Zavidovići („Službeni glasnik Općine Zavidovići“, broj: 5/08 i 5/a/08), koje nisu u suprotnosti sa Zakonom o principima lokalne samouprave u Federaciji Bosne i Hercegovine i ovom Odlukom.

(2) Općinski propisi ostaju na snazi do donošenja gradskih propisa, ukoliko nisu u suprotnosti sa Zakonom o principima lokalne samouprave u Federaciji Bosne i Hercegovine i ovom Odlukom.

Član 13. (Registracija Grada)

Najkasnije u roku od 30 dana od dana stupanja na snagu ove Odluke izvršit će se registracija Grada kod nadležnih organa, promjena pečata, tabli sa nazivima i memorandumima, preuzimanje poslova i arhive, dokumentacije i zaposlenika općinskog organa uprave, te preduzeti druge radnje neophodne za funkcionisanje Grada.

Član 14. (Dostavljanje Odluke Parlamentu)

Nakon donošenja ove Odluke ista će se dostaviti Parlamentu Federacije Bosne i Hercegovine radi donošenja Zakona o uspostavljanju Grada Zavidovići.

Član 15. (Stupanje na snagu)

Ova Odluka stupa na snagu danom stupanja na snagu Zakona o uspostavljanju Grada Zavidovići i bit će objavljena u „Službenom glasniku općine Zavidovići“.

**PREDSJEDAVAJUĆI
OPĆINSKOG VIJEĆA**

Redžo Seferović

OBRAZLOŽENJE

PRAVNI OSNOV ZA DONOŠENJE ODLUKE

Pravni osnov za donošenje Odluke o proglašenju Grada Zavidovići je član 5. Zakona o načelima lokalne samouprave u Federaciji Bosne i Hercegovine („Službene novine Federacije BiH“, broj: 49/06 i 56/09) kojim je propisano: „

(1) Grad kao jedinicu lokalne samouprave koja predstavlja urbanu, infrastrukturnu cjelinu povezanu svakodnevnim potrebama stanovništva.

(2) Grad se, osim ustavom, uspostavlja federalnim zakonom na osnovu sporazuma o udruživanju dviju ili više općina, odnosno odluke općinskog vijeća općine koja ispunjava propisane kriterije stava 1. ovog člana, a koja ima najmanje 30.000 stanovnika, odnosno u čijem gradskom središtu kao zaokruženom urbanom području živi najmanje 10.000 stanovnika.

(3) Grad u smislu ovog zakona predstavlja sjedište kantona i u slučaju neispunjavanja uvjeta iz stava 2. ovog člana.

(4) Izuzetno od uvjeta iz st. 1. i 2. ovog člana, gradom se može proglasiti općina od posebnog historijskog i kulturnog značaja.

RAZLOZI ZA DONOŠENJE ODLUKE

OPĆI PODACI: Prema Zakonu, općina i grad kao jedinice lokalne samouprave imaju iste nadležnosti, prava i obveze.

Međutim, stjecanjem statusa grada, jedinice lokalne samouprave dobivaju na većem značaju u odnosima prema međunarodnim organizacijama i partnerima. Razlog za donošenje ove Odluke proizilazi iz činjenice da Općina Zavidovići svojim statusom industrijskog grada koji se oduvijek naslanjalo na vlastite snage i potencijale usmjerenog ka evropskom putu, kao i prisutni trendovi na našoj Općini ukazuju na potrebu promjene statusa u grad kao jedinicu lokalne samouprave s jačim društvenim i političkim utjecajem.

Općina Zavidovići prema popisu stanovništva iz 2013 godine ima 35.988 stanovnika na području cjelokupne općine, a u samom gradu Zavidovići kao gradskom središtu živi između 13.000 i 13.500 stanovnika.

Općina Zavidovići predstavlja urbanu cjelinu koja je infrastrukturno povezana svakodnevnim potrebama stanovništva i prostire se na površini od 555,69 km². Kao druga općina po površini Zeničko-dobojskog kantona. Geografski pripada centralnoj BiH koju, svojim položajem, „veže“ sa sjevernom i sjevero-istočnom BiH. Teritoriju općine Zavidovići čine četiri manje prirodne cjeline određene slivovima rijeka Krivaje, Gostovića i Bosne. Graniči sa općinama Maglaj, Žepče, Kakanj, Vareš, Olovo i Gradom Zenica u ZE-DO kantonu, te sa općinama Lukavac i Banovići u Tuzlanskom kantonu.

Teritorijom općine Zavidovići prolazi željeznička pruga Šamac-Sarajevo-Ploče (16 km) i trase regionalnih puteva u ukupnoj dužini od 80 km kojim je povezana sa općinama Maglaj, Žepče, Olovo, Kakanj i Banovići.

Na teritoriji općine se nalazi 47 naseljenih mjesta organizovanih u 21 mjesnu zajednicu. Zavidovići su urbani, administrativni i privredni centar općine.

Na području općine Zavidovići radi 6 centralnih osnovnih škola (dvije u urbanom dijelu općine Zavidovići i 4 u ostalim naseljima) sa 10 područnih škola i 3 srednje škole: Gimnazija, Srednja tehnička škola i Mješovita srednja škola smještene također u urbanom dijelu općine Zavidovići.

Zdravstvenu zaštitu stanovništvu pružaju Dom zdravlja Zavidovići sa ambulantama porodične medicine, specijalističke ordinacije Kantonalne bolnice Zenica i 9 apoteka.

Nosilac aktivnosti iz oblasti kulture su JU “Centar za kulturu” Zavidovići, JU Javna biblioteka Zavidovići i veliki broj udruženja.

Od kulturne baštine najznačajniji su “Stara džamija u Rujnici” i “Manastir Vozućica” (graditeljske cjeline) koji se nalaze na listi nacionalnih spomenika Bosne i Hercegovine, “Krivajina vila” te više nekropola stećaka.

U općini Zavidovići djeluje 25 sportskih kolektiva. Posebnu tradiciju imaju rukomet, nogomet, kajak, planinarstvo a snažan razvoj ostvaren je i u borilačkim sportovima, odbojci, streljaštvu, golfu i dr. Za ove potrebe općina Zavidovići raspolaže velikim nogometnim stadionom, sportskom dvoranom, savremenom streljanom, sa više sportskih poligona, vrhunskim golf terenom itd.

URBANI RAZVOJ OPĆINE ZAVIDOVIĆI: Naselje pod imenom Zavidovići prvi put se pominje u osmanskome popisnom defteru 1565.godine i veže se za širi prostor današnjeg grada Zavidovića.

O naseljenosti prostora općine Zavidovići u daljoj prošlosti svjedoče arheološki nalazi iz neolita na lokalitetu “Tuk” kod Zavidovića i manji broj nalaza iz bronzanog doba u dolini rijeke Gostović i Krivaja. Južnim, istočnim i zapadnim dijelom današnjeg prostora općine Zavidovići vodili su putevi (“drumovi”) u vrijeme Rimskog carstva i koristili su se i tokom srednjeg vijeka. Područja razvoja naselja i urbanizacije su zapadni dijelovi općine (ušća Gostovića i Krivaje u rijeku Bosnu), srednji tok rijeke Gostović i Ribničko-Vozućka kotlina. S obzirom na geografski položaj i geografske karakteristike prostora, u dinamičnim društveno-političkim procesima šireg okruženja, područje općine Zavidovići je najčešće predstavljalo granicu pa je zasigurno bilo izloženo i snažnim demografskim promjenama uključujući depopulaciju uz razaranja i nova naseljavanja. U vezu sa tim se može dovesti relativno mali broj sačuvanih ostataka materijalne kulture starijih od 14.stoljeća uz istovremeno postojanje na desetine toponima koji se mogu vezati za ovaj period. Razvojem i učvršćenjem srednjovjekovne Bosanske države ovim prostorom se intenzivira trgovina – transport olova i srebra prema jugu već pomenutim putevima.

Osmanlije su 1463. godine poslije zauzeća Bobovca i Zenice produžili u dolinu rijeke Krivaje i dalje na sjever i dolinom rijeke Bosne do Zavidovića, Maglaja i Tešnja. Kada su tačno zauzeli ovo područje i tu uspostavili vlast nije poznato. Kao što je pomenuto, naselje pod imenom Zavidovići prvi put se pominje u osmanskome popisnom defteru 1565.godine i veže se za širi prostor današnjeg grada Zavidovića.

U osmanskome periodu su izgrađeni manastiri Udrim u Gostoviću i manastir Vozućica u Kalaišima (Vozuća) u XVI ili poč. XVII stoljeća a inače u tom periodu, sa pomicanjem granice osmanskog carstva prema sjeveru, počinje brži i kontinuirani razvoj naselja na ovom području a do tada poznate gradine gube na značaju. Podataka o drugim vjerskim objektima do XIX stoljeća još nema dostupnih mada se pominje više džemata u ranijem periodu.

Značajniji privredni razvoj ovog područja počinje pred kraj perioda osmanske uprave kada se planski počinje eksploatirati šuma izdavanjem koncesija stranim ulagačima. Razvoj drvne industrije i urbani razvoj dobija snažan zamah dolaskom Austro-Ugarske monarhije u BiH.

Formiranje grada i naseljavanje stanovništva počinje izgradnjom pruge Bosanski Brod – Sarajevo 1879.godine, koja na svom 133. kilometru prolazi kroz Zavidoviće.

Nova vlast ugovara eksploataciju šuma sa firmom “Marpurgo i Parente” iz Trsta koja 1887.godine gradi šumsku gravitacionu prugu dolinom rijeke Gostović a u Zavidovićima gradi pilanu 1897.godine. Ovu pilanu 1899. godine otkupljuje firma „Gregersen i sinovi“ iz Budimpešte i gradi novu prugu na lokomotivski (parni) pogon u dolini rijeke Gostović. Za potrebe obrade drveta stručni radnici dolaze u Zavidoviće sa područja cijele srednje Evrope, a u rad se uključuje lokalno stanovništvo.

U Zavidovićima dolazi i kompanija „Eissler i Ortlieb“ 1900. godine i gradi modernu pilanu tog doba kada se izgrađuje i uskotračna pruga dolinom rijeke Krivaje. Ista kompanija gradi i poznatu “Krivajinu vilu” (vila “Eissler i Ortlieb”). Izgrađena je za potrebe vlasnika kompanije kao njihova rezidencija. Ovaj objekat je praktično značio početak

izgradnje nove kolonije za radnike. Useljena je oko 1900. godine, i već tada je bila opremljena najsavremenijim vodovodnim i elektro instalacijama. Ovaj objekat predstavlja primjer stambene vile iz vremena Austro-Ugarske monarhije u BiH i namjera je istu staviti pod zaštitu i upravljanje od strane općine sa određivanjem posebne namjene za nju.

Razvoj Zavidovića dovodi do zahtjeva za formiranja općine 1902.godine koji je konačno riješen uspostavom općine Zavidovići 1911. godine.

Poslije I svjetskog rata razvoj općine se nastavlja sa osloncem na eksploataciju i preradu drveta. Od ranijih firmi nastaje "Krivaja" 1925.godine.

U okviru Kraljevine SHS/Jugoslavije i socijalističke Jugoslavije, granice općine se često mijenjaju da bi se ustabilile 1958. godine i takve ostale do prije 15 godina kada su se desile manje izmjene. Pomenute izmjene granica i preustroj općine (7 puta) u posljednjih 100 godina su, osim političkih razloga, rezultat i ubrzanog sveukupnog razvoja sa svim elementima urbanizacije cijelog prostora općine.

Dostignuti razvoj uz potencijale i nova usmjerenja u oblasti privrede u posljednjih 20 godina iziskuju neophodne statusne promjene općine radi daljeg nesmetanog društveno-ekonomskog razvoja ove lokalne zajednice.

PRIRODNA BOGATSTVA: Park prirode Tajan predstavlja područje koje je nedavno postalo zaštićena zona. Pokret zelenih, planinarska udruženja, speleološka društva i ljubitelji prirode učinili su izrazit napor kako bi ovaj mali, lijepi ćošak Bosne postao zaštićeno područje. Planine ovih krajeva nemaju oštre vrhove kao centralne Dinarske Alpe, pa ipak guste crnogorične šume i beskonačne staze u brdima pružaju ljubiteljima prirode veliki broj mogućnosti za aktivan boravak u prirodi. Područje je bogato kanjonima. Kanjon Mašica je jedan od najljepših kanjona u sjevernom dijelu zemlje. Isklesala ga je voda u trijaskom vapnencu uz pomoć tektonskih poremećaja. Voda dijeli vapnenački masiv na dva dijela, Mašicu i Srednju stijenu. Najveća dubina kanjona je 350 m. Kada su obilne kiše i kada kanjon ne može da prihvati svu vodu, formira se prelijepi potok Suhodol. Kanjon je na pojedinim mjestima širok samo 3 metra, a nekada su ova mjesta bila čak i uža, ali su proširena kako bi se mogla vršiti eksploatacija šume. Kanjon je prepun pećina koje su idealna prebivališta medvjedima tokom njihovog zimskog sna. Lukina pećina se nalazi u podnožju vertikalne litice Srednje stijene. Svih dvjesto metara je oivičeno naslagama kalcijum-karbonatnog kristala, čije boje variraju od bijele do tamno crvene. Slično kao i u Orlovačkoj pećini nadomak Sarajeva, i ovdje su pronađeni ostaci izumrlog pećinskog medvjeda koji su stari preko 15 000 godina. Ova pećina je pristupačna čak i amaterima. Pećina Srednje stijene se nalazi u blizini Lukine pećine i otkrivena je u maju 2004. godine, i prepuna je dvorana ukrašenih prelijepim pećinskim nakitom. Dinamični eko-sistem Parka prirode Tajan domaćin je brojnim endemskim biljkama. Ovdje možete pronaći endemski Bosanski Ljijan (*Lilium bosniacum*), koji je vijekovima bio simbol bosanske države. Na ulazu u Lukinu pećinu je 30 cm široki bršljan (*hedera helix*). Na nekih 10 km od Parka prirode Tajan raste Gegersenova mlječika (*Euphorbia gregersenii* fam, *Euphorbiaceas*), još jedna zaštićena biljka koja se nalazi na crvenoj međunarodnoj listi ugroženih biljaka.

Općina Zavidovići je smeštena na obalam tri rijeke Bosne, Krivaje, Gostovića i njihovih pritoka, koje se svojom ljepotom i karkateristikama vodotoka uklapaju u prirodne ljepote općine Zavidovići. Pored ekološkog značaja, ove rijeke čine značajan hidropotencijal za općinu Zavidovići i mogućnost njihovog iskorištavanja za proizvodnju električne energije.

PRIVREDA: Prema posljednjim objavljenim statističkim podacima „Zeničko-dobojski kanton u brojkama“ za 2018. godinu u općini Zavidovići registrovano je 443 pravna lica, 304 poslovne jedinica u sastavu privrednih društava i 434 fizička lica (trgovačkih i ugostiteljskih radnji i obrta). Prema području djelovanja u skladu sa klasifikacijom djelatnosti „KD BiH

2010“ najveći broj registrovanih privredno-poslovnih subjekata je u području prerađivačke industrije, građevinarstva, trgovine na veliko i malo i ugostiteljstva.

Najveći broj postojećih privredno-poslovnih zona i subjekata smješten je u centralnom urbanom području općine Zavidovići gdje su utvrđene tri poslovne zone: Ekonomija- Batvice, Majdanska polja i Podubravlje sa kompleksima IP „Krivaja“, koje se nalaze u granici Urbanističkog plana Zavidovića.

Osnovu privrednog razvoja od davnina činilo je šumsko bogatstvo. U Zavidovićima je sjedište Javnog preduzeća Šumsko-privrednog društva ZE-DO kantona d.o.o..

GLAVNA PUTNA MREŽA:

ODREDIŠTE (od-do)	Dužina unutar općine (km)	kvalitet
ZAVIDOVIĆI- MAGLAJ	10	Asfalt-regionalna cesta
ZAVIDOVIĆI-MAOČA	38	Asfalt-regionalna cesta
ZAVIDOVIĆI- ŽEPČE	3	Asfalt-regionalna cesta
ZAVIDOVIĆI-KAKANJ	32	Asfalt-makadam
ZAVIDOVIĆI-PONIJERI	32	Asfalt- regionalna cesta i makadam
ZAVIDOVIĆI- KAMENICA	18	Asfalt-regionalna cesta
ZAVIDOVIĆI-OLOVO	39	Asfalt-regionalna cesta
ZAVIDOVIĆI-BANOVIĆI	32	Asfalt-regionalna cesta

Općina Zavidovići je prilično dobro uvezana sa okolnim većim centrima (Tuzla, Zenica, Doboj) uz nedostatak kvalitetne ceste Zavidovići – Kamenica – Kakanj - i Kamenica-Mitrovići - Pepelari koje su bitne za razvoj turizma i poljoprivrede.

Postoji mogućnost i budućeg kvalitetnijeg (kraćeg) uvezivanja teritorije općine sa budućim auto putem V-C i većim centrima izgradnjom autoputa Žepče-Tuzla.

KOMUNALNA INFRASTRUKTURA: Gradski vodovod snabdijeva oko 8000 korisnika od toga su 7500 fizička lica, a 500 korisnik pravna lica. Od ukupnog broja korisnika gradskog vodovoda na sistem odvodnje otpadnih voda je priključeno oko 50 % korisnika. Organizovanim prikupljanjem otpada obuhvaćeno je oko 8000 korisnika u svojstvu fizičkih lica (stanovi, kuće) i 450 pravna lica. Organizovano prikupljanje otpada vrši se na urbanom dijelu općine, te dijelom i na vanurbanom području.

OBRAZLOŽENJE PRAVNIH RJEŠENJA

U članu 2. i 3. Nacrta odluke određeno je da će Grad Zavidovići obuhvatati sva naselja koja se nalaze u sastavu Općine Zavidovići, te će doći u promjeni sjedišta iz ulice „Safvet bega Bašagića“ u ulici „Mehmed paše Sokolovića“.

U članu 4. Nacrta odluke propisano je da će Grad Zavidovići kao organe imati Gradsko vijeće Zavidovići kao organ odlučivanja i gradonačelnika kao izvršni organ Grada, što predstavlja promjenu u odnosu na sadašnje uređenje.

Grad Zavidovići će imati Statut kojim će se regulisati sva pitanja lokalne i mjesne samouprave kako je propisan u članu 8. i 10. Nacrta odluke.

Nadalje je u članu 9. Nacrta odluke propisano pravno sljedinštvo Grada Zavidovića sa Općinom Zavidovići, te time Grad Zavidovići preuzima nadležnosti, prava, obaveze i imovinu.

U članu 11. i 12. Nacrta odluke propisana je obaveza usklađivanja Statuta i svih drugih akata sa ovom Odlukom i drugim Zakonima ostavljajući rok od 12 mjeseci od dana stupanja na snagu Zakona o uspostavljanju Grada Zavidovići, te da će se do donošenja Statuta Grada Zavidovića primjenjivati odredbe Statut Općine Zavidovići koje nisu u suprotnosti sa Zakonom o principima lokalne samouprave u Federaciji Bosne i Hercegovine i ovom Odlukom.

Nakon donošenja ove Odluke od strane Općinskog vijeća Zavidovići ista će biti upućena Parlamentu Federacije Bosne i Hercegovine radi donošenja Zakona o uspostavljanju Grada Zavidovići, te da će ova Odluka stupiti na snagu danom stupanja na snagu navedenog Zakona kako je određeno u članu 14. i 15. Odluke.

FINANSIJSKA SREDSTVA POTREBA ZA PROVOĐEJE ODLUKE

Za provođenje ove Odluke potrebno obezbijediti sredstva u Budžetu općine Zavidovići u iznosu od oko 1.200,00 KM za finansiranje registracije kod nadležnih organa svih primjena u nazivu i statusu, kao i za pečate i štambilje koji su u upotrebi u radu Općine Zavidovići.

OPĆINSKI NAČELNIK

mr.sci. Hašim Mujanović